

Канон святой великомученице Анастасии Узорешительнице

Празднуем 22 декабря (4 января)

Тропарь, глас 4

Победоноснаго Воскресения истинноименитая наречена еси, мученице Христова, победы на враги поставила еси мук терпением, Христа ради, Жениха твоего, Егоже возлюбила еси. Того моли спасти души наша. *(Дважды.)*

Слава, и ныне, *Богородичен:* Еже от века утаенное и Ангелом несведомое таинство, Тобюю, Богородице, сущим на земли явися Бог, в неслитном соединении воплощаемь, и Крест волею нас ради восприим, имже воскресив первозданного, спасе от смерти души наша.

Канон, глас 8

Песнь 1

Ирмос: Песнь возслем, людие, чудному Богу нашему, свободившему Израиля от работы, песнь победную поюще и вопиюще: поим Тебе, единому Владыце.

Припев: Святая великомученице Анастасие, моли Бога о нас¹. *(Поклон.)*

Единыя вождельныя Христовы, Анастасие славная, доброты ищущи, претекла еси доброты мирския твердостью нрава и безсмертнаго наследия, мученице, сподобилася еси. *(Дважды.)*

Святая великомученице Анастасие, моли Бога о нас.

Слава: Ночь лестнаго омрачения, просвещением Духа озаряема, честная, претекла еси смысленне и ныне вселилася еси, идеже есть божественное сияние несозданныя Троицы.

И ныне²: Явися невидимый Бог, преестественно раждаемь, за благоутробие многое из Тебе, Дево Мати, обнищав, богатый, яко да безсмертием человеческий род обогатит.

Моли Бога о нас, святая великомученице Анастасие, яко мы усердно к тебе прибегаем, скорой помощнице и молитвеннице о душах наших. *(Поклон.)*

Песнь 3

Ирмос: Небеснаго круга Верхотворче, Господи, и Церкви Зиждителю, Ты мене утверди в

¹ Этот припев повторяется перед первыми двумя тропарями в каждой песне канона. Перед первым тропарем первой и девятой песен припев читается с поклоном, в остальных случаях – без поклона.

² Память святой мученицы Анастасии Узорешительницы приходится на препразднество Рождества Христова. Это нашло отражение в каноне святой, содержащем рождественские тропари. Рождеству Христову посвящены Богородичны в каждой песне.

любви Твоей, желаний краю, верных утверждение, единое Человеколюбче.

Святая великомученице Анастасие, моли Бога о нас.

Благочестным дерзновением гонителей притупила еси разжженных глагол стрелы, спасительным Словом обогатившись, Анастасие, и божественною любовью движания душевная управивши. *(Дважды.)*

Слава: Точию, мученице, вопияла еси: ищю Господа, к единой Того любви душу привязах, Сего осияться чистейшими богато блистаньи иду, обычая простотою.

И ныне: Неискусобрачная Отроковице, рукою носящаго всю тварь во утробе носиши, воплощаема, Егоже и раждаема восклоняеши в яслех, Младенца зрима превечнаго.

Моли Бога о нас, святая великомученице Анастасие, яко мы усердно к тебе прибегаем, скорой помощнице и молитвеннице о душах наших. *(Поклон.)*

Господи помилуй. *(Трижды.)*

Седален, глас 1

Яко невесту ты Христову восхваляем, дево, яко Феклу честную³ достойно почитаем. Темже и в памяти твоей проливаются реки исцелений: ты бо прияла еси благодать, яко хранящи заповеди Господни силою Духа.

Слава, и ныне, *Богородичен*: Молитвы раб Твоих прими, Богородице, и избави нас от всякия беды, яко рождающая Христа Спаса, избавителя душ наших.

Песнь 4

Ирмос: Услышах, Господи, смотрения Твоего таинство, разумех дела Твоя и прославих Твое Божество.

Святая великомученице Анастасие, моли Бога о нас.

Мученическое благославие любовью взыскавши, сего получила еси, твердо пострадавши несомненною волею, терпеливодушная. *(Дважды.)*

Слава: Исканною от свьше благодати ризою истинно одеялася еси совлечением тела, страстотерпице мученице всехвальная.

И ныне: Плотносец происходит от Твоего светоноснаго ложесна, Пречистая, Царь Небесный, яко на престоле, в яслех возлегий.

Моли Бога о нас, святая великомученице Анастасие, яко мы усердно к тебе прибегаем, скорой помощнице и молитвеннице о душах наших. *(Поклон.)*

Песнь 5

Ирмос: Утренююще вопием Ти: Господи, спаси ны; Ты бо еси Бог наш, разве Тебе иного не вемы.

Святая великомученице Анастасие, моли Бога о нас.

Законно подвизалася еси, беззаконныя победивши, мученице всеславная, силою

³ Св. первомученица равноапостольная Фекла (I век) издревле особо почитается в Церкви как «жен слава, наставница страдальцев, отверзшая всем мучения пути».

Духа. (Дважды.)

Слава: Воскресение Божие образуети тезоименитством, враги проклинаящи невидимыя, всехвальная.

И ныне: В вертепе подземнем родитися от Девы Христос грядет, да веселятся всяческая.

Моли Бога о нас, святая великомученице Анастасие, яко мы усердно к тебе прибегаем, скорой помощнице и молитвеннице о душах наших. (Поклон.)

Песнь 6

Ирмос: Молитву пролию ко Господу, и Тому возведу печали моя, яко зол душа моя исполнися, и живот мой аду приближися, и молюся яко Иона: от тли, Боже, возведи мя.

Святая великомученице Анастасие, моли Бога о нас.

Святых мученик следящи терпеливно Христа ради подвиги, и тех потребам служащи, и гноения, преподобная, отираючи, обогатилася еси пресветло, тех сияючи благославием. (Дважды.)

Слава: Капли врачеваний изливаеши тучами божественных дарований, и страстей реки воспрятуеши, и помоществуеши люте бедствующим, всеславная мученице Христова, Божественнаго Воскресения тезоименитая.

И ныне: Исцеляя человеческое естество, древним преступлением истлевшее, без тли нов раждается Младенец, и в Твоих недрах, яко на престоле, сидит, Безневестная, Отческаго не оставль соседения Божеством.

Моли Бога о нас, святая великомученице Анастасие, яко мы усердно к тебе прибегаем, скорой помощнице и молитвеннице о душах наших. (Поклон.)

Господи помилуй. (Трижды.) Слава, и ныне.

Кондак, глас 2

Во искушениях и скорбех сущи, к твоему храму притекающе, приемлют честная дарования от живущия в тебе божественныя благодати, Анастасие, ты бо присно миру точиши исцеления.

Икос

Воскресения Христова тезоименита сущи, падша мя ныне воскреси молитвами твоими, от чудес твоих каплю искапавши, мученице, души моей и запаления лютаго греха угашаючи. Мир бо спасаеши от страстей многообразных всегда, имиже и аз искушаемь есмь: ты бо, всем вся подаючи, миру точиши исцеления.

Песнь 7

Ирмос: Отроцы еврейстии в пещи попраша пламень дерзновенно и на росу огонь положиша, вопиюще: благословен еси, Господи Боже, во веки.

Святая великомученице Анастасие, моли Бога о нас.

Огонь испепелила еси лестный, якоже дети, пламени приобщившись, показоваше тепло рачение, богомудрая, егоже к твоему стяжала еси Владыце и Жениху.

(Дважды.)

Слава: Тучи проливаеши врачеваний, уставляючи паление недугов, и люди присно устроиши песнопети: благословен еси, Господи Боже, во веки.

И ныне: Чудо, мысль удивляющее, совершаемое в Тебе, Дево Мати: родити имаши Бога и в яслех восклонити, Херувимом неприступнаго и невместимаго естеством.

Моли Бога о нас, святая великомученице Анастасие, яко мы усердно к тебе прибегаем, скорой помощнице и молитвеннице о душах наших. *(Поклон.)*

Песнь 8

Ирмос: Богоглаголивии отроцы, в пещи со огнем пламень попирающе, пояху: благословите, дела Господня, Господа.

Святая великомученице Анастасие, моли Бога о нас.

Храм Троицы показалася еси в божественных храмах, молитвами и пощении, Анастасие, упражняющися, благословите, зываючи, дела Господня, Господа. *(Дважды.)*

Слава: Крепчайшими словесы Хрисогона, страсотерпице, укрепльшися, идолов немощное попрала еси суровство, доблественне пострадавши.

И ныне: О Боговместимая Отроковице! Родиши Младенца, Творца веков и неизменнаго Господа, в Вифлееме граде за неизреченную милость.

Моли Бога о нас, святая великомученице Анастасие, яко мы усердно к тебе прибегаем, скорой помощнице и молитвеннице о душах наших. *(Поклон.)*

Песнь 9

Ирмос: Воистинну Богородицу Тя исповедуем, спасеннии Тобою, Дево чистая, со безплотными лики Тя величающе.

Святая великомученице Анастасие, моли Бога о нас. *(Поклон.)*

День веселия приношает ти тварь, Анастасие, память прославляючи, Егоже прославила еси, Слова, твоими кровьми. *(Дважды.)*

Слава: Светом чистейшим ныне осияема, молитвами твоими просвещатися свыше всем нам проси, мученице благодарная.

И ныне: Светло вся тварь ныне да радуется: Богородица родити грядет от Бога Слова, Человека бывшего.

Моли Бога о нас, святая великомученице Анастасие, яко мы усердно к тебе прибегаем, скорой помощнице и молитвеннице о душах наших. *(Поклон.)*